

四庫全書

集部

欽定四庫全書

九靈山房集卷四

元 戴良 撰

山居稿第四

碑

浦江縣新建婺女星君行祠碑

至正十二年十有一月庚寅浦江縣新作婺女星行祠  
明年十有二月戊午祠成縣之父老合辭請於官願刻  
石紀其事俾文學掾邵國光來請文且曰惟婺女星之

正祠在婺城之西南按圖經吾婺自秦漢以來其名號不一至隋開皇中始以其地上直婺女之分而更今名唐武德四年遂祠婺女於州城宋淳熙十三年爰賜祠額曰寶婺觀逮國朝大德十年縣人朱仙母病嘗禱之祠下有奇應因又立行祠於縣之東南阨則吾縣之有婺女星祠實自仙始也比數年來湮廢殆盡達嚕噶齊廉君額能巴哈尹蕭君文質將復加完繕而病其遺址卑陋湫狹不足以安神而安靈乃別卜西南高爽之地

以斥大之然工役繁鉅費莫之出則募富民六人者俾率其賦以從蓋至是而庶公之代已及蕭公悉舉以自任始事之日仍輟已俸為之倡不期月而大殿成兩廡三門次第畢舉翼以欄楯繚以垣牆階陛以石唐皇以甃肖象繪塑各效乃能絜威惠慈悉當其狀殿之為間者三廡之為間者六門如其殿之數基之深十有四丈廣八丈有奇屋之高二丈有奇度用錢六千緡用工八百祠既成矣願得吾子之文篆諸牲石以示後之人國

光敢奉父老之言以請良謹考傳記自南斗十二度至  
婺女七度為星紀於辰在丑為吳越之分野吳越之地  
至廣也其所分郡縣不止於一婺而是星之祠乃獨見  
之於此者豈非因星以名郡者耶夫星宿之在天州城  
之在地明光所燭神氣必通其上下之應次舍之限真  
有不可誣者有司營立祠宇以奉其明靈行其秩祀以  
祈其歲事於禮典豈不宜哉至於嚴像設崇貌位被服  
而人肖之則固未之前聞矣然猶必為之者蓋其民俗

之所習尚焉耳嗟乎神者民之所恃以安也今既本於禮而祠祀之因其俗而像設之則所以望其出靈隲社以大范吾民者不其至哉吾民於此其尚敬承乃志以延休於無窮可也廉公北庭人豈弟愛民人懷其惠蕭公大梁人通敏有才器撫事有方略凡學院廟壇之宜葺者皆以次而舉此祠殆其一也良既納交二公頗知作祠之始末而又重以父老之言國光之請因不辭而紀之且為迎享送神樂歌三章俾歌以祀神其辭曰

望天門埃神蹕靈之來光景溢雲為軒霓為旌儻若有  
靡象形禮已交誠既感享維德非可薦

右迎神樂歌一章

暉將出夜既艾靈之留神哉沛烟燎升羽籥鳴牲幣舉  
黍稷馨靈是娛歆精祀鑒民衷錫繁祉

右享神樂歌一章

樂度周禮容備靈之歸福祚至陰沴息陽德宣粒我民  
屢豐年民報事益無怠歌我詩其千載

右送神樂歌一章

趙氏尊序堂碑

趙氏汴人也自武節大夫士翮隨宋渡江居睦州已而武節之子保義郎不玷添監浦江稅務故又為浦江人保義生三子曰訓武郎善連曰武經郎善近曰武經郎善迢浦江諸趙稱三派之子孫者是其後也趙氏自宋改物而其族已衰顧今七十年間能緜其宗允而弗墜者益鮮保義之六世孫永新守大訥因念夫趙宗之鬼



餒馬而不食也乃思闢堂以祭享之先是永新之曾從祖修職郎汝儵亦以無子而死後之人以其所居廳事為黃冠者祠祠之後堂則虛而弗居遂即其堂治為祭享之所春秋有事則割田若干畝歸之以供其費堂成扁曰尊序嗟乎趙氏自保義徙居以來傳圭襲蓋嘗烜赫百年矣即一旦衰弱子單孫之祭有不能享顧瞻庭宇行道咨嗟又豈所以思惟本源慰答宗親之義哉永新於此乃能盡焉感念因其故宇而作斯堂使春秋

之祀既廢而復舉可謂以義起禮者矣雖然作之非難而守之為良難為永新之子孫者其尚敬承乃志以延裕於無窮可也乃作詩曰

趙居汴京為宋宗親世襲官封有社有民越武節君始失故所從宋于南嚴陵是處保義筮仕于浦之陽遂奠其居持持屋牆亳社既墟宗枝亦悴故鬼久飢聞者與喟厥有孝孫知孝之元既豐其流乃羨其源仙巖之南江浦之北歸哉斯堂孝孫是闢孝孫來享來拜斯堂肩

臚脩潔黍稷馨香登堂受胙孝孫有祐延畀後人永尊  
厥序匪尊厥序日報爾先琢辭貞石百世斯傳

贊

浦陽五賢贊

并序

天地之間有至鉅而無配者道也人能心會而身履  
之口誦而書存之則必浩乎其大巍乎其高淵乎其  
深非江海而潤非雨露而澤非日月霜雪而光華嚴  
厲其所著見於後世者固將弊穹壤亘古今而不窮

貫金石蹈水火而不滅矣余嘗考之於經稽之於史  
求其如斯人者恒曠數十世而一見越數百里而一  
得浦江有縣歷年至淺而受地至狹非有數十世之  
久數百里之遠而乃得其五人焉何其盛哉五人者  
曰孝子陳公助教節愍二梅公忠惠王公待制柳公  
也孝子不知何時人能服勤孝道當二親之亡哀哭  
弗輟以衰麻終其身每即墓奠肴果烏鳥為之不啄  
助教當宋宣和初攝處之松陽丞已而盜發青溪東

南諸郡縣咸望風橫潰公獨嬰城自守以死殉國節  
愍於靖康之際為戶部尚書當金人入寇劫質天子  
竟乃不勝忠憤率衆數十萬謀夜擣其營迎歸二帝  
事泄而死忠惠克明正學歷疏諸經及登嘉定甲科  
遂以及人為務立朝居郡綽有可稱勁節高風至今  
熟在人口待制問道文安金公上邈朱子之學亦既  
身逢盛世以文華國四方學者稱之至與虞揭黃三  
先生齊名嗚呼五公之卓卓如此豈非所謂有道之

士哉豈非所謂浩乎其大巍乎其高淵乎其深者哉  
使其大施諸用以殫夫潤澤光華嚴厲之功其所著  
見可勝既哉雖其不克大用亦豈弊穹壤亘古今而  
有窮貫金石蹈水火而有滅者哉如良者固不足以  
灼見五公之所蘊然觀陳公之事親則未嘗不稱其  
孝觀二梅公之事君則未嘗不歎其忠觀王柳二公  
之為人則未嘗不慕其學以稱其孝歎其忠慕其學  
之心可無一言擬諸形容哉借令曠數十世之久越

數百里之遠猶將低徊企想以稱述其萬一而况近在二百年之內百里之間哉昔梁肅李華之於四皓也時之相後如其久地之相去如其是其遠及作為贊辭以致歆羨之意識者尚或稱之良雖不敏既獲親出五公之鄉接其風聲氣澤而頌聲不作人其謂何用敢勉竭駑力各為贊一章以朗前人光韻之美以伸後學嚮慕之私然以孝為百行之先故用陳公為贊首自餘四公則從其世次而列見焉

孝子陳公

太竭

倬彼孝思天經地義我公履之式昭厥懿無父何怙無  
母何恃公於斯時病殷痛鉅乃號穹旻口無停聲月益  
歲增有悴其形衰斬三年古訓是程曾不為就終身焚  
瘠人亦有言孝行之至可通神明可感異類粵惟我公  
天相乃志肴果每陳烏鳥颺去昔秦顏生同出其鄉亦  
以孝感烏吻為傷公雖後起其德則似令聞令望曷其  
有已千秋萬祀永稱孝子配彼顏氏



助教梅公

溶

咨爾梅公溫溫而恭恂恂而忠有大雅遺風遭世中危  
遭彼寇鋒救逋令遁以公折衝公謀既決遂往式遏乃  
以柔和化為猛烈亦既載旆亦既建節如火之熱如冰  
之裂力有不支猶驅義師怒目張膽以死自期曰身可  
殺義不可虧帝曰爾溶古之烈士肆命之祿併祿其子  
以愧蚩蚩而惜一死人誰不死死貴合義惟我梅公以  
死拄世前聖有云殺身成仁夫豈彼人而盡不聞

節愍梅公

執禮

於彼出日其光燉燉妖氛一襲天地為昏有飈凜然勢  
豁九門飛廉不將天步斯屯宋有社稷繼五季而國不  
知不識咸順帝則彼豕忽突大邦為敵血戰未息二帝  
奄北矯矯梅公從此奮激指心誓天願出機先手除群  
穢捧轂南轅既秉我鉞既脂我牽致天之罰則莫我敢  
逼如彼飈風其勢發發將埽氛昏陽光有赫事世羣庸  
力屈強兇生義死忠嗚呼梅公

忠惠王公萬

榮榮王公碩學粹行以道律身以德施政輪對之明見  
之於立朝宣化之美見之於為郡帝嘉乃烈俾居言責  
獻可替否疑疑額額諸史之罪上通於天奏章一抗正  
氣凜然不忍澆季老奸擅世遂舍而去流水莫繫帝謂  
王公有遺直之風錫之土田以旌其忠至今言者猶為  
震恭在宋嘉定士俗靡振公獨屹然進退以正其進也  
如振鷺之在庭其退也如飛鴻之入冥逸類超倫舉世

未聞

待制柳公

貫

朱學之傳至於文安四葉繇繇公得其師猶水有源際  
茲休明儒雅勃興乃以所挾揚於帝廷帝嘉其能俾居  
搢紳與鴻碩為倫莫之與京於樂辟雍曰公是宗髦士  
三千于于而從頌臺有禮公訂古始佐明文治成我皇  
之志大江以西政闕教弛武子之澤一墜於地公往化  
之有若時雨歸卧窮山垂十五年流水去住浮雲往還

鋒車薦至乃掌帝制惟公出處闕時隆替出與時行處  
與道俱脩爾岐陽之鳳忽焉空谷之駒千載曷窺蜀山  
魏巍

廉齋宋先生像贊

以公為優於德耶則其才學之奕然者固已披豁乎心胸  
也以公為優於才耶則其德性之粹然者固已充溢乎顏  
容也以公為才德之兩優耶則其所以自處之者又若  
不有於其躬也夫德者乃才之所資以發而才者乃德

之所賴以充也二者皆公之所有而謂公之自有其有者曾不足以知公者也嗚呼若公者其殆有若無實若虛以庶幾夫顏氏子之遺風者乎

趙敬德畫像贊

卓哉趙君曰敬德氏英英以豪表表而偉視古今如一時謂天地猶一體以孔孟為師友以王謝為兄弟彼區區之斗筲曾不足以浼已凡是胸次之豁達一皆浩氣之所致故其為文也直欲凌韓而駕柳其為詩也亦且

超杜而逼李然而著述之富固已見誇於當世之老成  
至於氣岸之高則或召非於鄉閭之小子彼惟惡直而  
醜正遂爾駕尤而騰毀夷考其中之所存君益庶幾乎  
無媿此其所以交之久者知之深知之深者信之至觀  
夫丹青是僅得其一二矣

趙樗菴像贊

澤可以及物而身不必貴德可以惠後而家不必裕孰  
謂斯人祇局於藝苟施澤之益厚又知德之逾真誠無

媿韓伯休之行已宋清之為人

箴

諫官箴

并序

諫之道有五而諷諫為之首孔子亦曰吾從於諷諫  
焉諷諫也者謂君父有過而難言之故或托興以見  
乎詞或假事以陳其意冀有所悟而日遷於善也是  
則職諫事者又豈在乎過直以激怒哉亦曰婉以導  
之巽以告之期於必聽而已耳何為其然也當其一



是一非錯然相間而欲使之更革其所行必且悖於目而拂於耳謬於心而戾於情自非至公至明之君孰能樂聽之哉以不樂聽之言顧乃冒雷霆犯顏色而弗忌其不投鼎鑊而觸刀鋸者幾希矣今夫富貴寵榮人之所不能忘也刑戮流放人之所不能甘也苟或昧之而不計豈不甚可病哉所可病者非止病其身之危也亦以病吾言之不卒聽也非止病吾言之不聽也亦所以病吾君也既有以病吾身而又有

以病吾君君子亦何取於斯焉作諫官箴其詞曰

於惟我國稽古建官凡是職司莫諫為難諫不欲逆亦不欲驟逆則罔從驟則靡究所貴婉巽不大聲色匪攻彼暗惟導彼明以善間惡猶火背水火盛水消善勝惡止盍不燕閒乃陳我言乃遏其萌乃迎其端諷而不迫我言斯聽陷而不避我其隕命勿謂逆鱗可得而批折檻之諫或以為過許勿謂鯁骨可售吾直斷鞅之諫或以為過激齊有晏子格君孔多欲罷大臺乃飲而歌魏

有閻沒亦云善諫欲辭梗陽乃饋而歎過既無迹諫亦無形藹然千載德譽愈榮嗟爾後人盍視前式苟視前式惟晏閻是則爰考爾官用規爾箴爾如不懲亦獨何心

喜聞過齋箴

并序

古之人苟有過焉必喜人規故其德日滋今之人苟有過焉必忌人知故其德日墮嗚呼生今之世而可不思古之時乎詩以箴之其殆庶幾也已箴曰

言與道違行與道背維背維違斯過之大過豈有大小  
由小積過小而為終累大德人誰無過改之乃宜勿病  
不改病其不知知之為美匪聞曷以我過我聞改之斯  
易何以喻我聞過之因獨形於喜過乃可聞苟挾我行  
苟持我言悻然自好莫之敢干彼非我兄彼非我父孰  
肯拂心以賈我怒宜喜而怒宜愛而憎我曾不寤我過  
易懲惟古仲由喜於聞過赫然千載令名愈播嗟我後  
人盍視前規惟仲由是師既榜我齋又箴我銘有或不

慎亦忝所生

銘

具慶堂銘

并序

范陽衛立本扁其奉親之堂曰具慶浦江戴良為之  
銘

我之生矣孰揆厥初惟父與母載育此軀亦既冠履方  
趾圓顱可忘孝養慚彼孝烏我觀世間是心孰無有懷  
二親莫或具俱全而既具其樂何如象服不頗大冠我

巍偕老一堂載歡載娛粢粢門子白華絳趺馨爾晨飴  
潔爾夕蔬其穀維何有鱉有魚其蔬維何伊苟及蒲登  
堂奉觴氣和色愉式拜且舞疊疊忘幼禮則罔愆孝豈  
有餘何彼儉人弗此之圖豈無富貴碩大且訏或被輕  
裘或駕文車是或不思胡寧勝余亦有士子左圖右書  
取青婉白抉摘荔蕪苟虧是道何異賤儒相彼凡行疇  
其獨殊關血通氣惟父母且此而克孝罔有加諸顯顯  
衛氏世號雙珠爰樂具慶用扁室廬小子不敏勒辭座

隅尚慎旃哉永世弗渝

辭

鄭挺冠字祝辭

有序

義門鄭伯陽將冠其長子挺亦既筮得穆日乃以其  
從祖貞和先生之命宿賓於同里戴良良因屢辭不  
敢貞和曰願吾子之終教之也遂往與茲酌醴且本  
商頌松栢有挺之義製其字曰叔高而祝之以辭曰  
猗歟那歟噲噲其正誰闢斯廬我寢我成寢其成矣羣

材彙征惟挺者楠獨爾高乘可陵沆瀣可摘日星俯瞰  
千仞危而不傾我觀是木產彼幽垌一朝效用巨細必  
登居下而汙閭闕是丁卑而甚力曰為旅楹閑闕戶牖  
闌楯檻櫺冗微瑣屑僅脫薪蒸彼哉梁棟固莫與京苟  
任之重亦懼弗勝豈若斯楠覓出杳冥衆木仰視靡或  
不承獲躋登茲伊誰之令惟材之長乃高其升靖惟我  
人同具是形及其用世或重或輕或幽而辱或顯而榮  
何異此木以材自呈爾生鄭挺今既弱齡寧復處卑不



是之懲以茲吉日具弁於庭曰加爾首俾棄孩嬰本諸  
詩義考諸禮經字爾叔高式敬爾名爾其自今毋替厥  
稱苟材孔長會處高明矧爾孝義九世繩繩皇用褒之  
有奕門旌既當承宗奉此嘗烝猶栢槎然衆木所憑一  
不自持載騫載崩兢兢業業孝道乃興又况是道古語  
有徵曰先百行惟孝為能人克履之實洪厥聲所處之  
高舍此曷營幸祇訓辭勿忝所生我言匪陋惟聖道之  
程

論

論長孫無忌

長孫無忌以元勳近戚輔相三朝竟乃坐視武氏之姦而莫之或救卒以殉之觀其事未嘗不為之流涕也方太宗建儲之際固以疑晉王之懦弱而有意於吳王恪矣無忌乃為之擁護晉王而疎恪豈不以晉王為已之出而欲藉之以長保富貴故耶太宗且死無忌遂以遺命立晉王既又陷恪以罪而誅之無忌於此亦可謂計

出萬全矣殊不知害已者乃不在於恪而在於晉王之武氏也武氏陷無忌以反固不異於無忌之陷恪以逆若武於此時明恪之寃而以構害元德茂棄宗親戮之無忌其謂何無忌此舉又豈止禍及一身而已雖唐室之衰亦未必不自此始也何則恪之在諸王中誠英果人也使恪而不死於無忌之手則武氏之姦心猶有所忌也夫惟武氏之無所忌而後李氏之子孫無遺類矣唐之衰也又豈待於易姓改號之日而見之哉嗟乎以

無忌之才猶乃一舉而家國俱亡則彼大臣之謀國而欲一出於智力信不可矣

論唐太宗六月四日事

余讀唐史至太宗六月四日事為之喟然太息嗟乎以太宗之英武好名而卒定計於秦府群小惜哉太宗首倡非常之謀以戡定海宇則高祖之有天下誠太宗之功也雖然立子以長不以功高祖之欲傳位於太宗固義有不可而太宗之屢辭不受者豈亦有見於此乎由

是而觀則太宗之心固已灼知大義之所在矣其後卒至喋血禁門貽譏萬世而不顧者亦由房杜二人陷之而然耳豈獨房杜哉當是時太宗既誅巢隱一二近臣惟勸其釋甲以就刑可也若高祖念其事非得已而原之然後輔之以圖後功亦可也竟乃釋此不為而尉遲敬德者方乃擐甲持矛直至上前借曰恐其驚動上意亦何事於矛甲哉敬德此舉直恐高祖之怒心一發且將不利於太宗故特假此以迫脅之使高祖於此不幸

偶如其所料則敬德之矛寧無所施乎尚賴高祖隱忍而曲全之故得深潛而不發耳雖然苟非蕭瑀陳叔達輩為之陰移其所向則高祖寧不逆探其本心耶設有以逆探其本心執付大理以論罪太宗將何說之辭秦府群小之不忠於所事乃至此也噫此輩未足深恨太宗為一代賢君亦從之而不疑何其悲哉

論王珪

諫君有道乎曰有人心亦各有所蔽有所明故善諫者

常不攻其蔽而惟導其明使之自悟而已矣是故自其所蔽而攻之則言難入而聽者厭自其所明而導之則不必苦口正言但微中而紛已解此蓋諫君之道也王珪諫太宗出王瑗之妻其庶幾知此者乎夫好色乃太宗之所蔽而懼亡則太宗之所明故珪必先論王瑗得妻之由而後以郭公善善之事告之則太宗之祛所蔽也有不待其辭之畢矣當是時使珪厲聲正色曰此姬必不當取此姬必不可留彼方溺於聲色之娛而怒其

出言之暴也其肯不旋踵而遽出乎褚遂良在唐室號稱王魏之亞然當高宗立武后之際遂良為之叩頭出血而帝心終不之回者無他故焉蓋高宗之蔽在於嬖寵武后而遂良方且逆其所蔽而攻之其能痛抑而悅從哉適足以殺其身而已矣嗚呼遂良之忠則盛矣語其才猶在王珪下也在易坎之六四曰納約自牖終无咎然則王珪其賢乎

說



容齋說

大梁劉侯官浦江之始年嘗即其所居西偏之室治為  
宴息之所而名曰容齋越明年部使者武威余闕公行  
縣於是嘉劉侯之能大其德也為特書以題之劉侯圖  
侈公賜亦既鏤版揭諸楹間復俾縣人戴良為文以廣  
其說良曰嗚呼是尚有待於余言哉侯之自北而南亦  
嘗觀夫泰山之與南海矣有石稜稜或裂或崩如鵲之  
飛如羊之蹲墮而若星凝而若雲變怪竒崛不得而具

論有土黑赤有木棘櫟載虺載瘕不埏不埴梓匠之所  
棄捐陶冶之所屏斥又有鷓鴣鷹隼之禽獮豸虎豹之  
獸號鳴飛走怒爭狠鬪喧騰乎左右凡是數者宜在所  
不容而泰山寶藏之有溝有渠有汙有榮瓜蔓而流負  
羽不勝難任我舟難濯我纓亦有蛇虺蛟鼉噴浪乘濤  
含沙蛭石射影衝波駢馬電躍水兕雷咆揚鱗而掉尾  
閃舌而呀齒噓腥而吐穢凡是數者宜在所不容而南  
海寶納之故能萃律差我嶠嶠礧礧超出萬類特立九

霄雲雨蒸騰風雷蕩摩天下莫與爭其高汪洋洄渟渺  
渺汙汙其下無底其旁無垠顛倒日月浸潤乾坤天下  
莫與爭其深由是觀之泰山也南海也所以能致其高  
與深者以其有容也傳曰山藪藏疾川澤納汙殆謂是  
歟今夫邱陵非不穹然高也然不得與泰山並高者由  
其容之者小也沼沚非不淵然深也然不得與南海並  
深者由其容之者淺也故論容德之極而至與泰山之  
與南海止矣古之君子不褊淺以為量惟含忍以為容

掩垢匿瑕以大其德故曰有容德乃大又曰我之大賢  
歟於人何所不容是蓋無異乎泰山南海也侯能登泰  
山以求其所以高臨南海以求其所以深則容之為義  
得矣容將以大其德也德之大舍泰山與南海孰得而  
方之侯於此思無愧焉可也而尚有待於余言哉而尚  
有待於余言哉侯名師稷字之佐大梁名家有文學而  
尤粹於行治家治人一本於寬人稱為長者云

說佩

送義門鄭仲舒

詩不云乎雜佩以贈之則佩者蓋古所以贈人而勉之  
以取法者也今仲舒之行亦既無佩之可贈獨為之說  
以告之何如仲舒曰是余之志也乃作而言曰仲舒其  
知是佩之說乎上俯而下承中銳而旁曲也上而不俯  
則無以綴下下而不承則無以係上中不銳則不能以  
有擊旁不曲則不能以有受居乎上者珩居乎下者衝  
牙之與璜也珩言其俯衝牙與璜言其承也衝牙居中  
而能銳璜居旁而能曲也合是三者所以具為佩之制

而為君子之所法焉者也若夫資以係上而中貫之者  
瑤資以綴下而旁貫之者琚錯乎瑤瑤者珠聯乎琚瑤  
與珠者綬一皆參居乎三者之間而非其要也非其要  
者謂不為君子之所取法也必君子之所取法而後可  
則雖有環以召之有玦以絕之有金以寒之有象以文  
之有觴以示其事有牒以表其用有韋以戒其性之急  
有弦以警其志之緩亦皆不足以言佩也是蓋超居乎  
三者之外而非其類也非其要而猶待是以成佩者以

其能安是佩於君子也非其類而猶冒之以為佩者以其能存是佩於君子也然所以得為佩之正而為君子之所取法者則惟三者為然也三者之所以能然者亦在乎上俯而下承中銳而旁曲也今仲舒與其兄仲幾弟仲潛三人者懷玉而遠遊抱器而效用太師大丞相見而竒之因館置府下十餘載其所以貴重之者往往有異於他士後雖薦達之以有祿位於朝然亦不使遠違乎左右蓋凡治已治人之道恒欲資之而有助焉則

夫三人之見取於大丞相者豈不猶斯佩之見取於君子矣乎三人者誠能俯乎其民若珩之有綴承乎其君若璜與衝牙之有係銳以去惡若衝牙之有擊曲以納善若璜之有受吾見其示法於君子也其亦異乎琺瑯珠綬者矣其亦異乎環玦金象觴觥韋弦者矣雖然珩也璜也衝牙也非生而有之也必待君子者而為之制然後俯焉而俯承焉而承銳焉而銳曲焉而曲以克成乎其為佩也然則三人之不愧於斯佩者豈非由我大



丞相有以玉成之乎而三人者其尚益守乃職以期無負乎大丞相可也三人與良皆友善而仲舒為尤厚今仲舒以三年之喪畢奉大丞相之命還京良益望其有以見法於君子也故於其行為之說佩以贈

書

答徐進明書

比辱函書為贊欲相與以質其所學僕既愚無似又且齒弱而身賤其素所為未有足稱其取信於人人亦未

嘗有以是事資於僕者今足下乃獨冒然及之其亦何所取擇耶豈足下之有取於僕者徒以其鄉多先生長者遂謂能得其學而有可以及人者耶是殆不然人之為學固由於先生長者而後得然未可以是而必其有學也通都之市有大賈焉所以聚天下之貨寶通遠近之有無當市門之晝開也鄉之人持資而求寶者至矣遠方之人持資而求寶者亦至矣而大賈者因為之出其寶以權其價價之合也則捆載而去之其不合也則

倒橐垂囊攘臂而空出方是時又奚暇問其鄉之人與其遠方之人哉今夫先生長者之於學亦猶大賈之於寶也大賈之於寶不能偏私於鄉人先生長者之於學又豈能獨厚於其鄉哉由是觀之則君子之論人當取其人之賢而不必惟其鄉之信亦已明矣若不問其人之賢而惟以其鄉之信則是孔孟之里皆可以為聖賢盧鄭之鄰皆可以為醫卜西子之國皆可以充後宮師曠之邦皆可以備工瞽伊傅之黨人皆可以輔相於明

王孫吳之邑子皆可以雪恥於強敵矣其在物也則麒麟之數皆可以稱仁獸鳳凰之苑皆可以名神鳥翡翠之囿皆可以言珍禽騂騮之櫪皆可以目良馬矣夫蘭茝之谷蕭艾茂焉杞梓之林荆棘出焉蓬生於麻薪錯於楚物之不繫於其類也久矣又可以其善者而遂信其不善者哉考之於人既如彼求之於物又如此而足下之於僕顧乃不問其可否不論其是非徒見其鄉之多賢即謂其人之必賢其亦取擇之不審矣取擇之不

審已不可用之於交好况欲相與以質所學耶夫質之云者為師者之事也師自柳河東已不敢當是名矣而返以施於僕使僕有過於河東者乃可為足下師若猶未也則是佞譽誣諛妄加是名以相欺耳縱僕樂足下之佞譽昧足下之誣諛輒受是名而不辭然於足下亦何所增加哉足下固非佞譽誣諛之人特以過信之故不覺其偶類耳僕之屑屑云爾者亦欲足下之審擇所與以益其所學非敢過為訐直以相角鬪也足下苟以

前者之所陳比物引類曲喻而旁譬之則有以曉僕之意矣適有小病不能親書幸察

上蘇伯脩叅政書

代柳致明

某比承姚掾史傳示鈞喻需及先子遺稿悲喜感怍交動於中循想累日無所容措伏念先子自受學以來即援筆為文章激搜靜索脇不沾席者五十有餘年此其志豈不欲藉是以自託不朽哉顧以弊於蹇剝既壯而羈窮未老而閒退業愈習而家愈貧名愈聞而身愈困

迨至暮年方僅僅一起而疾病崇之遂以殞命某等奔號數千里迎櫬遠歸而家事益落由是送死養生百冗叢聚神傷氣悸衆念昏忘故其遺稿之在篋笥者未暇整次成帙以顯揚先志某竊聞之士子之在當世生雖不偶死而垂聲者有矣故揚雄沒而法言始行馬遷生而史記未振文字之傳恒在既死之後也然非得大君子為之發揚以振聳其視聽則亦不能因其文以永其聲矣先子之亡行且十載遺文之傳此惟其時而卒湮

沒之若是者或者以為未得大君子為之發揚也閣下以厚德縟文為善類所依歸其所以嘉惠士子振起幽滯者往往而是况先子在日又嘗曳裾門牆之下脩容屏愚之間故相善也則夫大君子者不求之閣下將安求乎借使閣下方執政於朝越在數千里之遠猶將跋涉山川踰淮沂河而進况當近蒞浙省統有方隅而某也幸獲以編人齒於治內不於斯時露其所藏以希大君子一顧之重是果於陋劣無志其為不孝甚矣用敢



探其所著詩文合四十四卷惶恐獻上倘蒙不遺雅故  
念及朽骨施恩惠於既死發幽隱之耿光則是文之傳  
雖未能如法言史記之盛行而死後垂聲亦有以少伸  
先子之志矣使先子而有知寧不銜感於地下乎某雖  
區區無似而結草之報此心昭然尚當課其子姓世誦  
名德以無忘大造惟閣下垂憫焉干冒威嚴伏增戰越  
某再拜

九靈山房集卷四

欽定四庫全書

集部

九靈山房集卷五

六

詳校官檢討<sub>臣</sub>德生

中書<sub>臣</sub>劉源溥覆勘

總校官庶吉士<sub>臣</sub>倉聖脉

校對官主簿<sub>臣</sub>汪日贊

謄錄舉人<sub>臣</sub>曹夢齡

欽定四庫全書

九靈山房集卷五

元 戴良 撰

山居稿第五

記

浦江縣修學記

浦江之在婺叢爾縣也而制宜有學治門之東南其學在焉然歲久且壞比數十年雖屢加繕理而僅取苟完無經久意今縣大夫始至乃喟然興歎謂學之所急惟

田與廬今監縣廉侯阿尼雅巴哈既嘗歸其侵疆矣顧茲  
屋廬之圯壓吾得辭其責哉遂與主簿劉侯師稷合謀  
修治而俾教諭祝君應昇宣其勞應昇既受命即為禮  
致治經之士張天錫吳實飭材徵工率先凡役而他有  
藉於學者因皆相勵而趨為之自殿庭門廡以逮泮池  
論堂齋舍牆垣廩庖溷之屬悉皆易弊為良有加於  
昔始事至正辛卯之秋九月及冬十一月而成於是應  
昇暨學之耆碩方先生樛相與屬筆於良以記其役良

屢謝非其人不獲命乃記之曰春秋之法凡一工役之  
與必備書以示譏蓋所以重民力也若僖公之修泮宮  
固亦嘗用其民力矣考之於經乃不與南門諸役者並  
存豈不以學校為有國之先務而僖公修之實為其所  
當為哉為其所當為而不書雖謂見與於春秋可也嗚  
呼僖公不可作矣今縣大夫之能若是不亦僖公之徒  
歟然僖公之修泮宮也魯人嘗作泮水之詩以頌之先  
儒孔氏發詩人之意不特謂僖公能修其宮又謂僖公

能修其化是則所謂修者豈止乎棟宇之宕崑丹腹之  
華鮮而已哉亦曰有政焉耳縣大夫又當思所以圖之  
而無媿乎僖公可也泮水之詩其首章有曰思樂泮水  
薄采其芹縣大夫之嘉惠吾邑之士者至矣其二章有  
曰載色載笑匪怒伊教吾邑之士尚於縣大夫而重有  
望焉縣大夫大梁人名文質字彬祥姓蕭氏以儒林郎  
來為令官未幾治三皇廟葺故所有書院月泉上尋興  
是役以嘉來學是可謂知為政者矣

黃氏歸田記

諸暨東行六十里是為孝義鄉為其鄉之望者曰黃君松松故儒家由科第居顯宦者若干人而百年之喬木嘗盛矣及一旦衰松之孫某遂以愚騃盡廢其先業至以百金產僅易一醉飽富豪之家爭為巧計圖之而族人之無賴者又從而鼓扇其間以故田凡八百餘畝屋凡二百餘楹無一步一椽存者維揚樂侯來署州事行視州境遂察知其弊一日召買產之家及某立庭下歷

以古者仁厚之化義禮之俗開陳之而且反躬念過至  
於泣下衆因俯伏首實告曰惟賢侯命是從至夜漏半  
侯復列香炬對天誓衆俾伸者右抑者左衆又悅服當  
右者右當左者左於是冒取者償其業低直者益其金  
金入則贖其質田之應期者曾不滿一月不答一人得  
田如千畝屋如千楹歸其家俾其母妻弟姪之散亡他  
處者咸群居聚食如家之盛時候猶慮其久而莫繼也  
益選宗親之富而賢曰義曰鏞者以掌出入之數而且



經紀其家事於是義與鏞及凡黃氏之族莫不德侯之為願得余文記之庶幾永侯之德於無窮乃以張君辰所序事介宋君時憲以請嗚呼若侯者其賢於世更遠矣蓋自授田之法壞而兼并之俗興富右豪強乘民之愚以襲取其家業者有矣然民未甚病也迨夫聽訟之吏出焉考覈之不明剖決之靡中構辭累歲而元姦宿猾因舞手以規民而民始病矣世吏之不賢其重病民多如此由是而言則為侯之民者雖不幸遭家之中變

其亦庶乎無憾焉昔韓延壽守左馮翊時民有訟田者延壽為之引咎自責其民深自悔悟願以田相移終死不敢爭史書其事至於今傳之侯之此舉固史臣之所取而後世之所宜傳也其可記以永久者有不在余文矣

自得其樂齋記

金華朱原良以自得其樂名所居之齋禮部尚書達布哈公嘗為書之間乞余言以記之余則復於君曰君之

所樂可得而聞之乎凡世之可以快耳目娛心志者其  
為物至夥崑崙之玉南海之珠涪水之金蜀之文繡象  
犀虎豹之齒角皮草豈君之所樂也哉君曰非也此蓋  
世之人之所樂也重珪累組高牙大纛以至狐貉之裘瑚  
璉之器萬鍾千駟之奉列鼎之食豈君之所樂也哉君  
曰非也此蓋世之人之所樂也然則君之所樂者可得  
而知矣湯之盤禹之鼎岐陽之鼓岱山鄒嶧會稽之石  
刻師曠之琴孔子之文章與夫漢魏隋唐之桓碑彝器

銘詩記序下及古文篆籀分隸諸家之字書皆可喜可  
玩而昔人之所以深樂之者也世人之所樂者非君之  
所取則昔人之所取者必君之所甚樂也然昔人之樂  
亦豈易哉君惟視世人之可樂者不一動其心乃能退  
而獲樂於斯彼世之人能致其樂矣而其不得兼焉者  
獨昔人之樂耳惟世之人不得兼然後君得以取之而  
自得亦豈偶然也哉雖然余嘗因君之樂以求夫聖賢  
之所謂樂者矣聖賢之所樂者蓋樂乎其內也非以其

在外者言之也樂乎其內者道也則凡在外之物孰得而加之哉斯樂也孔子得之顏淵繼之顏淵沒得之者鮮矣然則君之所得者其亦有得於此否乎苟得之人且謂之有道之士矣君曰某不敏敢不敬蚤夜求從子之教遂書其本末以為記

樂善堂記

東彛王君和陽人雖累歲崎嶇戎馬間然雅意不忘交友嘗於所寓闢堂曰樂善以延天下之善士於是

知名之彥咸喜從之遊每風晨月夕則相與坐堂上或談性命道德之奧或論古今人事之得失民生之利害或雅歌投壺彈棋擊筑以盡其歡忻其所與遊而最密者如劉君伯溫章君三益胡君仲申皆嘗獲登斯堂為文以頌君之美君猶以為未足而復乞言於余余聞之駭且愧焉鄙人於善無所聞君之所樂者烏得而知之縱知之又豈能出於三君所言之外哉雖然三君之文皆以樂乎在己之善言之也予則以為君之闢斯堂也

固將以延天下之士矣則君之所樂者固樂乎天下之善也而豈一已云乎哉請得而卒言之可乎夫世之所以快耳目娛心志者其為類衆矣而君子弗好之弗好之則弗樂之君子之所樂者惟在乎天下之善也以天下之善為可樂古之人有行之者矣叔向之在晉樂乎駿茂之善而用之也鮑叔之在齊樂乎管仲之善而舉之也樂官屬丞吏之善而進之者鄭當時也樂兩龔兩唐之善而獎之者何武也以至孔融之聞善必薦陸倕

之樂善孜孜是皆以天下之善而樂之也天下之善一也惟得其位則用之舉之獎之進之薦之不得其位則樂之而已今君猶未得乎其位者也以是為樂不亦宜乎雖然君之樂乎天下之善者固將以成夫一已之善也成夫一已之善則人之樂於君者亦多矣故君之出入軍旅非一日求其同列有陷其父母者矣有踣其妻子者矣有鋒鏑其身者矣今君之父母既皆以令終而其妻子則固自若也身之無恙則猶前日也此皆樂善



之效也彼之不能以若是者蓋以其所樂者富與貴耳  
富貴之毒人也甚於鴆惟其樂之深也故其毒愈深  
猩之樂於酒魚之樂於餌彼豈知其為亡身之具哉  
由是而言則君之賢於人亦遠矣傳曰人之彥聖其  
心好之尚亦有利哉予敢以是為君慶君曰子言信  
矣雖然某也不敢當不敢當則請書之壁間朝夕鑒  
觀焉

柳待制墓表碑陰記

先生沒後之七年其友烏傷黃公為著石表辭一通凡

若干言良得而讀之未嘗不歎公之深於知先生也先生家浦陽江之上自其先世頗能文而先府君以科第顯至先生遂以文擅於天下天下之士識與不識咸能道其姓字雖武夫俗吏不通文義者亦爭得先生之文以為榮先生之見知於當世久矣然其所以知先生者徒以其文爾而德之蘊於躬者人未必盡知之也今想其溫如春風肅如秋霜粲如雲霞之卷舒凝如崖嶂之森峭恢恢乎而有容也汪汪乎而莫測也澄澄乎而不

可撓也。以之正家而家齊，以之蒞官而官治，蓋將無所施而不可。然則先生之學，豈直文而已哉？嗚呼！先生已矣，其不可傳之妙，亦既與物而俱化矣。自非石表之辭，歷叙而鋪張之後，人何自而知先生？雖然，非公之善於形容，又曷足以致是哉！良故歎公之深於知先生也。世之以文求先生者，視公為何如哉？公少先生七歲，而其出遊於耆老成人間，乃皆與先生接。及先生之歷仕中外也，又未始不與之相先後。是蓋交友中之最親且

久者惟其交也久故知之深知之深故書之審公非有私於先生也良猶記寒夕宿先生齋閣中先生擁衾語良曰余之交友滿天下然知我者莫若黃公我死必求表其墓嗚呼先生之有望於公至矣而公固有以慰先生之望哉先生之子自將刻公所著表辭於荆山之阡良因書公之所以知先生者附見於碑陰世欲求先生之為人更當有考於斯

脩禊集後記

右脩禊詩一卷予友宋先生景濂為之序嗚呼景濂之  
為此序不既至矣乎自晉以來序修禊者多矣其為古  
今所共取莫若王右軍然右軍之言亦不過區區生死  
之間惜時序之迭遷歎斯人之易老於以致其感慨之  
情耳至於聖賢之大道則固未之有及也惟其莫及於  
道也遂致晉之士習卒以不振清虛勝而禮法衰曠達  
興而名檢廢雖謝安之功業可尚孫綽之問學足稱然  
其雅好游談耽嗜華藻亦不免於君子之所譏原其故

右軍豈得辭其責哉今景濂則不然懼斯道之不聞而末俗之益媮也既以舞雩之詠勗之復以山陰之集戒之終篇數語凜乎其可畏嗚呼使晉諸人而聞此咸以惜時歎老之心而為汲汲求道之舉則當時士習寧有不振者乎獨恨景濂不生於彼時不得與之言又恨晉諸人不生於今不及取衷景濂之論也雖然晉之諸人亦既於道無聞矣則凡諸君之有聞於景濂者又可不思所以自勉哉苟不以之而自勉則雖功業如謝安問

學如孫綽亦非君子之所予况未必爾乎諸君於此惟  
究心焉可也良也不敏然嘗叨與斯會矣故於景濂之  
言不能不有慨於其心申繹其意於末簡蓋所以勉諸  
君而且以自勉焉爾

序

經筵錄後序

經筵檢討鄭君仲舒哀其所進勸講之文若干篇為一  
卷題之曰經筵錄攜歸浦陽山中屬良序之良以古之

聖王雖有聰明敏達之資然至其成德則未嘗不由學而致是以高宗之在殷也三年弗言恭默思道其質亦既美矣而傳說告之乃更勤勤講學之勉載諸說命之篇者不曰學於古訓則曰惟敷學半不曰惟學遜志務時敏則曰念終始典於學豈不以美質易得至道難聞必也質美而學修然後所造為益深所積為益厚而聖德之成有不期然而然矣豈惟高宗唐虞三代之君莫不盡然故揚子曰學之為王者事久矣堯舜禹湯文武



汲汲其已久矣斯言豈欺我哉然自周衰已來道術不明為人君者莫知學先王之道以成其德為人臣者莫知勉其君以學先王之道上下之間一皆卑近淺陋以各趨所便其能卓然於當時者惟漢之文宣唐之太宗耳然而此三君者亦不過以近美之質發為一代之治至於為學則曾未之及故其所就僅有以賢於後世之庸主若論唐虞三代之盛德則邈乎其遠矣由是觀之帝王之聖否其不繫於講學之興廢哉今天子寬仁明

睿天性自然踐阼以來務遵節儉食菲而衣絺臺卑而  
圓小不溺情於便嬖不惑志於遊畋可謂有不世出之  
資矣然猶痛念漢唐失學之弊慨然欲上追唐虞三代  
遐遠之迹薦開經筵以訪多士自大丞相而下及凡侍  
從宰執之有與於勸講者莫不畢趨禁近俾得推演化  
原以講求其意舉六藝載籍之文而紬繹其說至於講  
文之作則檢討職也居是職如仲舒者又極一時之選  
故其所進悉皆不以卑近淺陋為言其所言者無非先

王之至道然又論議詳明情辭懇切有足以感動其聖  
心每一勸講間必為之首肯者數四嗚呼仲舒等之盡  
忠天子之受盡言何必古人此非書傳所載講學之事  
乎此非唐虞三代之君臣乎昔伊川程子之在元祐講  
筵屢嘗以正心之說為聖學之勉紉陽朱子之在淳熙  
經幄亦嘗以誠敬之言為聖學之勸然皆不能見聽於  
時君徒以一誦而遂罷今仲舒是錄既無愧乎二子之  
所陳而又因緣勸講之臣以悟當宁之聽卒使海宇之

內陰被其賜而不知可謂竒逢幸會千載一時而君臣之際何其盛哉嗚呼吾黨之士以其文字見知於世難矣況得施於朝廷而又當人主講學之時則夫後世讀仲舒之文者必將歆歆感慕有不可及之歎然後知其時為難遇而是錄之傳非徒表仲舒於不朽然且有以明天子之盛德於無窮矣仲舒名濤世居浦江之白麟溪上兄弟二人俱通籍禁中為時所稱云

送葉贊玉序

昌黎韓子嘗謂清淑之氣蜿蜒扶輿磅礴而鬱積其水土之所生必有魁竒忠信才德之民豈不信然歟廣信為郡西連江右南控閩粵而玉山冰溪之勝又盤旋乎左右故其清淑之氣每鍾而為人西京而下唐宋為盛唐姑不論宋渡江後如陳公康伯以中興事業著見一時謝公疊山以風節行義照耀千古他若俞公大雅則以紫陽高弟為後學所宗師而傅公季魯又以象山門人為當世所貴重嗚呼是果何以致是哉蓋山川之所

鍾往往見之於是郡故也我國家混一以來是郡人物之衆固未易一二數余所託交者則有葉君贊玉葉君才高而學廣上而羣經叢史下而庾辭僻句靡不悉該善議論能文辭甲申間嘗以禮記高選貢於鄉有司用新例授婺之月泉山長到官未幾新祭器之朽弊者復土田之侵奪者屏學徒之貪蠹者於是會集儕流招徠學子為之敷揚先聖人之道三年政成受代而歸邦之人士咸相率賦詩以惜其去不以良之固陋俾為之序

嗚呼若葉君者殆向所謂魁竒忠信才德之民非耶則夫廣信之地靈人傑固非陳謝輩所能獨當也余猶恨葉君居陳謝二公之鄉其才與學又不在陳謝二公下乃不能如二公之得位行道以自見於時顧獨抱其遺經而於朱陸之門弟子有志焉不亦重可惜乎雖然海內寧謐日久皇上銳意儒術日與二三學士大夫講議經帷以復二帝三王之治葉君固將自是登名吏部進之館閣以共圖太平他日見諸行事亦豈在陳謝二公

後哉崧高之詩曰維嶽降神生甫及申山川之鍾秀於  
葉君厚矣又曰維申及甫維周之翰葉君尚奮乃志以  
無負山川之所鍾可也余既喜廣信之代不乏人而又  
嘉葉君之克繼前武故因序詩而併致其期望之私若  
此云

喜雨詩序

至正辛卯夏六月大梁蕭君來治婺之浦江時境內已  
彌月不雨民心弗寧君愀然憂形於色視事之日即齋



沐率僚佐遍禱諸神越翌日癸卯乃雨甲辰又雨既而  
不雨者復彌月公聞縣南有白石湫為龍神所宅遂赤  
日走大澤中以祈其應乃七月乙亥雨至八月戊寅而  
止君猶以為未足因與龍約三日內雨足次日癸未輒  
大雨竟夕甲申雨乙酉雨自是泉之竭者悉已溢禾之  
槁者悉已蘇民之病者悉已愈而我君之憂亦釋而為  
喜矣邑之大夫士因交相告語曰吾屬作於是息於是  
以克享有豐年於是者皆我君之賜也其可無情乎哉

爰相率賦詩以歌美之以良受知於君為特深俾執筆  
序其首良惟春秋記魯十二公之行事獨僖公三年書  
夏四月不雨以志其閔雨書六月雨以志其喜雨自餘  
群公則固未之聞也然觀僖公之在魯不過曰有志乎  
民與之以同其憂樂耳而孔子之取之者正以當時諸  
侯罕能如是也夫以三代之季人材猶盛求其有愛民  
之心者已罕見之若是去三代遠矣民情日以渙散吏  
治日以偷惰有能如我君之用心者豈易得哉惜世無

孔子不得取之簡冊使與僖之名並傳於天壤間也乃  
今明良相逢進賢用能如不及他日君以政成而去必  
將疇其民庸而圖任之則位當益崇利澤之及人當益  
厚宜有史氏之筆大書特書以見諸詞翰垂之汗青者  
僖公固不得而專美之也是用弗讓而志其歲月於篇  
端以俟

送浦江主簿劉君滿歸序

大梁多宦家而傳世之久稱劉氏劉氏之先有累官河

南路二十八軍州軍民都總管者與其弟懷安陽門馬步都元帥從太祖皇帝定地有功其所至又皆以不殺為務當攻破金汴時所賴以全活者甚多總管公兄弟亦既以功拜官而其長子遂皆繼襲父職珪組相傳者五人已而元帥之仲子亦以武功起家為河南路轉運使其後有為州郡牧守者有為縣令及轉運同知者有為理官及主簿司者劉氏傳世之久如是哉良生也後不及拜總管公兄弟於馬前以覩夫衣冠之盛而幸獲

識其諸孫之佐遂有以詢其家世之一二之佐主吾婺  
之浦江簿能以簡易為治用法匪峻而豪右自服遇人  
有恩而請託不行亦劉氏之佳公子也今既滿三載而  
去邑之人士咸為賦詩以道其去思良於之佐為最故  
又更為之序竊考漢史所載兩漢之將相如陳平鄧禹  
者皆其有功於當時者也然陳氏既卒其子即以有罪  
國除後竟無顯者而鄧氏之後乃累世貴寵為公侯及  
大將軍牧守侍中者凡若干人此其故何如哉平之言

曰吾世多陰禍吾世即廢終不能復興而禹則曰吾將百萬之衆未嘗妄殺一人後世必有興者由是觀之則鄧氏之後所以異於陳氏者豈非其所積有不同耶嗚呼二氏之事既已考諸史而有見乃若劉氏之傳世獨久亦豈難知哉必也總管公兄弟能以不殺為務故其後嗣得以世食其報庶幾乎鄧氏之代不乏人向使其所積者一有所不然吾恐故家喬木榮悴之不常雖欲自異於陳氏之後不可得矣興廢之來夫豈偶然哉之

佐於此其尚思自奮激以保有乎先澤可也雖然之佐  
之治縣既不以苛政而殺人而其冢嗣又方由祖蔭入  
官不久且調自餘諸子亦皆力學好修有仕資則夫積  
善之報又復自之佐始豈直保有先澤而已哉良於是  
益有以卜劉氏之後為鄧而不為陳也大梁宦家寧復  
有出其右者乎之佐行有日凡頌美之辭惜別之賦已  
見於群公之篇什良故特為論次其傳世之久者題諸  
首簡云

甘棠集序

北庭廉侯來長婺之浦江浦江之民咸愛戴之如父母  
畏敬之如神明倚賴之如山岳三年政成治任將歸而  
黃童白叟涕泣以遮留者動千百計已而侯之去志浩  
不可挽又皆退而悲思商賈相與歎於市行旅相與歎  
於塗耕農相與歎於野低徊顧盼不知所圖則推夫吾  
黨之工乎詩者作為聲詩以詠歌之一縣之士詠歌之  
不足則五縣一州又從而詠歌之五縣一州詠歌之不



足則旁近他郡又從而詠歌之於是篇章之富合若干  
首縣之好事君子遂擇取其尤者編而為集以我民之  
思侯無異於召南之思召公故名其集曰甘棠集且俾  
良序而刻諸梓良嘗讀詩至甘棠之篇蓋深有取夫召  
南之思召公者矣召南之思召公固無往而不在然乃  
必於甘棠而見之者豈不以召公之在當時嘗布文王  
之化且或舍於是樹之下故國人之被其化者因皆思  
其人而惜其物惜其物則欲其勿翦之矣欲其勿伐之

矣既欲其勿翦伐之又欲其勿敗之又欲其勿拜之噫  
何其思之至者歟今我民之思侯固亦無所不用其至  
矣然其所以見之於思者乃不能如召南之託之於其  
物顧徒有以託之於其詩豈我侯之宣化於是地曾無  
一物之可指耶意者是物之在天地間風雨之所飄搖  
霜露之所剝蝕雖其惜之之深保之之至或不能不免  
乎異日之必衰詎如是詩之作播之於一時傳之於百  
世無風雨霜露之虞有深長悠久之意是則託之於其

物固不若託之於其詩矣又况彼之有思於召公者僅著乎召南之一國至於他國則曾未之及若我侯之見思不惟著之於一縣抑且形之於他縣不惟形之於他縣又且溢之於他郡然則我民之思侯豈果在召南下哉我民之思侯既不在召南下則是集之命名舍甘棠而誰宜序而刻之良益不得而辭也集凡二卷他文字之有紀於侯者具見集中侯名阿尼雅巴哈字景淵云

送祝彥明詩後序

三衢祝君彥明以儒入官為浦江文學三年政成受代而歸義門鄭彥貞氏命諸子姓作為詩歌以道其惜別之懷而吾友宋先生景濂實為之序良雖不敏竊嘗納交於彥明又且受知為特厚獨能已於言乎三衢古稱太末其地四通五達而士之生於其間者往往文武忠義沛乎非他郡所能及自今觀之清獻趙公則以淳德高節師表天下屯田劉公則以易學蘊奧開悟後來彥猷宅卿二徐公叔績毛公則以守死善道感奮當世其

他自北而南以徙居其土者亦皆卓犖一時有足稱道  
趙丞相范侍讀馬諫議其人也衣冠文物之懿詩書禮  
樂之傳彬彬然郁郁然其杞梓之茂林鳳麟之靈固歟  
既而故國淪亡文獻殘缺而士友之來自三衢者每從  
而叩之則遺言逸行已皆失所考徵蓋至是而百年之  
耆舊邈乎遠矣比歲以來一二俊傑雖稍稍拔起而良  
之寡陋又不足有所接識以觀其為學之所至良之所  
接識者彥明一人而已彥明生當諸老告謝之餘獨能

集其舊書誦而傳之以時時稱說其履歷之所自庶幾夫流風餘韻之可見者乎至正初嘗以憲府之薦調官吾學需次幾十年始克領其教事然其識趣恬退曾不以閒曹冷局為嫌每旦深衣幅巾巍然高坐以發明聖經賢傳之指歸諸生列處齋廡手披口誦自晨興至夜分不得休以為常由是士習之陋日以除俗學之靡日以變而吾鄉學校之設不為具文矣至如復土田之侵奪新屋廬之朽敗先達之未祠則祠之文會之未舉則

舉之此在時人以為能而於吾彥明直其餘事耳嗚呼  
彥明之成就如此其殆有所自來哉邈鄉學之淵源泉  
前人之風裁以其得諸已者淑諸人譬猶有源之泉愈  
出而愈不竭苟被其灌溉沾其潤澤初不待於時雨之  
滋而條達暢茂自不期然而然矣傳曰魯無君子斯馬  
取斯何其言之甚似歟雖然彥明之在浦江筮仕之始  
也職下而事拘曾未及從容政治之場以行其所志他  
日位益顯年益增道益懋其所設施當必大過於人雖

趙公之師表天下劉公之開悟後來徐公毛公之感奮  
當世趙馬范三公之卓犖一時無難到者又可以今之  
所就為已足哉彥明於此尚有以勉之可也良也塊處  
窮鄉邈焉寡侶晝耕夜讀質問無從其於彥明之去寧  
不盡然有動顧惟禍患餘生筆硯久棄莫攄情素以寫  
別懷徒以三衢人物之盛序之末簡庶乎期望之私少  
寓一二云

九靈山房集卷五



欽定四庫全書

九靈山房集卷六

元 戴良 撰

山居稿第六

序

送宋景濂入仙華山為道士序

金華宋景濂先生通古今學有史氏長材當至正中嘗以翰林國史院編修官徵之固辭不起後竟寄迹老子法中入仙華山為道士一日良從而訊之乃曰昔人有

以紳笏為柴柵聲名為韁鎖者余豈為是過激哉顧將  
順性而動各趨所安耳余之所安乃在於山林而不在  
於朝市使其以此而易彼有大不可者一決不能者四  
余聞居人倫必以禮處官府必以法然自閒散以來嬾  
慢成癖嬾則與禮相違慢則與法相背違禮背法世教  
之所不容大不可者此也又心不耐事且憚作勞酬荅  
少頃必熟睡盡日神乃可復而當官事叢雜與夫造請  
將迎之不置一不能也嘯歌林野或立或行起居無時

惟意之適而欲拘之以珮服守之以卒吏使不得自縱  
二不能也疑坐移時病如束溼一飯之久必四三起而  
當賓客滿座儼如木偶俾不得動搖三不能也素不善  
作字舉筆就簡重若山岳而往返書札動盈几案四不  
能也以一不可之性而重之以四不能自度卒難於用  
世故舍之而遁又聞道士遺言吐納修養可使久壽故  
即其師而問焉雖然世之賢士大夫聞余之有是行也  
必並起而嘲之子知我者何不贈之以言使有以解彼

之朝而且以卒余之志也良應之曰夫君子之出以行道也其處以存道也而其所以為道者蓋或施之於功業或見之於文章雖歷千百載而不朽垂數十世而彌存若是而為壽可也苟不其然顧欲潔身隱退逃棄人間而苟焉以圖壽為道是固老子之所謂道而非吾之道也吾之所謂道者乃堯舜周孔之道也然堯舜周孔得聖人之用者也老子得聖人之晦者也於出也則吾用於處也則吾晦而是道之變化詎有異耶故生以春

陽殺以秋陰先生功也舒為雲霞祭為日星先生文也  
功而不宰文而化成先生道也道在是則壽在是矣夫  
豈苟焉而已哉昔賀知章辭秘書之職請為道士於剡  
川陳圖南不應時君之召入嵩山為道士是皆有慕聖  
道之晦而寄迹於老子者也先生豈聞二人之風而興  
起者耶然二人之在當時賢士大夫未聞有非之者則  
先生是行又孰得而議之且一榮辱齊毀譽先生之為  
道然也亦豈有假於余言哉亦豈有假於余言哉先生

名濂其字景濂今易其名曰元貞子署其號曰仙華道士云友生戴良序

浦陽人物記序

浦陽人物記一書監縣廉侯到官之初年始請縣人宋景濂氏撰成之記凡二卷分為五類合二十有九人廉侯將刻梓以傳而俾良為之序良竊以為置書之原則翰林承旨歐陽公既言之矣而作者之意則經筵檢討鄭君又言之矣將復何所云哉雖然是縣人物之盛其

有繫於山川之所鍾者或未之及良安得忘言耶嗚呼  
浦陽於婺為小縣其土地僅百里人民不數萬無白金  
水銀丹砂石英鍾乳之貴無南金珠璣瑇瑁犀象之珍  
無橘柚竹箭及他草木之殊異顧獨於人物之生不一  
而足其以忠孝貞節著者有之其以政事文學顯者有  
之層見疊出彬彬乎其盛是果何為而然哉蓋山川之  
氣大則鍾而為人小則發而為貨寶動植之類所產者  
大則於其小者嗇矣郴州多白金水銀丹砂石英鍾乳

與夫橘柚之包竹箭之美則未見其有魁竒忠信材德之民交州多南金珠璣瑇瑁犀象與夫草木之殊異則亦罕鍾乎其人是又以其所產者小而於其大者有或嗇也嗚呼亦孰若吾浦陽之鍾其大者哉然世之人於其小者則往往知愛而夸張之至其大者則未有能宏搜廣輯以著其盛以故浦陽之文獻或不能勝夫郴交二州之所鍾今景濂氏以不世出之才蒐羅廢墜抉剔幽隱譔成乎此書使夫一縣之內數百年之間忠君孝



父之則施政為學之方以及女婦之範模莫不粲然具備交見乎吾前其視彼之區區土物之小者孰得而孰失哉吾見浦陽之為縣將自是而出色矣雖然非廉侯之汲汲於表章又曷有是哉廉侯名額能巴哈為政未幾德化大行蓋詩之所謂愷悌君子者矣

送欒宣使還省詩序

維揚欒君仲舉好學樂善敏於為吏丞相開府公才之辟為其省宣使今以事抵浙東道過雙溪之上於是其

弟架閣君與之為別者且三載一旦會之是郡意甚歡洽已而仲舉復命相府詰朝將行架閣君悲四鳥之異林感三荆之分植遂賦近體詩一章章八句以送之且詒郡庠諸友俾之交和以贈余方叨居郡庠目覩珠玉可無一言以序其首竊聞漢蘇子卿為中監時嘗賦詩以別其兄有曰昔者嘗相近邈若越與秦又曰惟念當別離恩情日以新蓋言兄弟相近之時未嘗不玩之以為常邈然若越秦之不相關及當離別之際不忍相舍

方知兄弟之不可離恩情至此而日新矣今觀架閣是詩得非予卿之意乎然予卿之詩特以兄弟之至情言之至於出處之大致則固未之有及也架閣則不然始之以私恩而卒繼之以公義愛兄忠君之心油然而並生讀其詩可以知其為人矣以架閣之為人則仲舉之賢又可知矣良既歆羨架閣之詩之美而又慕其兄弟之皆賢故樂書此以序之

贈勾無山樵宋生序

曩者承平日久天下無事士之居其位者悉以守常襲故為職業而智謀雄偉非常之人無所用其材往往退處山林老死而不出十數年來海內大亂豪傑並起自武夫賤藝咸被收采以用其所長則向之退處不出者宜可翻然而起矣然智謀雄偉如宋君汝章顧猶隱居勾無山中方以樵采自樂而不輕於一出何哉汝章為學不事章句頗通戰國時事善機變有膽略尤慨然喜論兵當兩浙兵起每退偃一室以默計勝敗十不失一

若汝章者可謂有用之奇士矣余嘗考近代賢材而怪士之為學多不適於世用談經術者徒知章句之當守而不知事情之或迂工文學者又方務以言語聲偶摘裂相誇尚每棄本而趨末求其可用於當時蓋不數數然也世之人不賢者恒多而賢者恒少幸而為賢者矣又或不足以用世何才難之若是歟苟一有其人焉幸而及出於有為之時可不為之貴重之歟今吾汝章以不輕出之故卒至放棄山林為勾無一老樵此其可以

嘻吁流涕而為當世悲也雖然古有朱買臣者亦嘗退  
隱會稽山中賣薪以自給後竟歷居顯宦時人謂之衣  
錦之榮汝章其鄉人也年方壯而志方銳他日必不得  
已而出又安知其不終為世用也哉汝章出遊甫旬日  
即歸勾無將從勾無求夫概諸山而登之以窺東南之  
故壤凡目之所寓皆我師用武處覽其形勝當必有感  
於中矣

禱雨詩序

中書左丞某公署事之初年天不雨自夏六月至於秋  
七月未盡槁民以病告公愀然憂形於色於是公之賓  
佐合辭進曰公毋憂也古有桑林之祝雲漢之祀皆所  
以致力於神也天而不雨盍禱之神乎越翌日丙午夜  
漏半公躬率郡縣有司走神所而雨即嘉應公復與神  
約三日雨足丁未雨戊申雨巳酉又雨連雨數日而止  
民乃大喜咸以為神之所賜而歸德焉金華戴良獨不  
謂然天以神和四時乳百穀於以煦養其生息者也今

乃嗇其施以病民必希吏之懇禱而後應是豈神之本  
心哉非神之本心而乃章章如是者蓋公之精誠有以  
上格於天故也公之所以上格於天者非在乎禱之之  
日也其素行固已合於冥冥也久矣是故無求而不得  
無感而不應也然則禱之神非歟曰是也夫雨暘者天  
之所權也山川者神之所伏也雨暘不時歲有饑饉則  
禱之山川之神豈非天之高且遠也不可以自聞不可  
以自見而寄之神是神用天之權也故天使之雨神得



而雨之天不使之雨神固不得而雨之也公是以神其  
聰而天無不聞也神其明而天無不見也無不聞無不  
見此公之所以致夫雨也夫如是民固當視公為神也  
於是民愈喜咸退而為喜雨之詩以歸德於公且俾次  
第其言為之序詩曰

維浙之東維黍芄芄今既稔矣伊誰之功維我相君視  
民如子撫綏輯寧俾安田里俾耕俾種俾耘俾耔苗則  
既秀雨澤不時相君瞻焉為民憂之誠之所感天不我

違山川出雲降以甘雨既優既渥厥施斯普今之上腴  
昔也焦土今之發榮昔也槁莽農人相慶蹈舞踴躍且  
歌且謠擊壤以言維今之雨匪降自天維我相君錫此  
豐年稼之有秋匪由民力維我相君錫此膏澤我有童  
烏捧腹歡如亦有鰥老今可以飽我聞我兵將討不庭  
有饑有糧可以啟行相君有心與天為一維國維民咸  
食其德田之多稼周人所美時之有年魯史所紀爰作  
此詩志今之喜頌我相君令聞不已

章氏家乘序

善乎魏國韓公之言曰謹家牒而不忘乎其先者孝之大也余觀章君三益家乘之作有以見君之孝大矣人之於其宗不能無親疎之殺也聖人因之而制服焉自再期而至於三月而至於無服其禮有差也其情有節也雖然豈聖人之得已哉兄之子於已為從子若以吾父視之猶已之子也推而上之大父之孫為從父兄弟曾大父之曾孫為從祖兄弟若以大父曾大父視之猶

已之兄弟也又推而上之以至於無服之親皆先世一人之分也若以先世視之皆已之同氣也尋流而知源尋葉而知根詎可以遠而忘之哉嗚呼此家牒之謹所以為孝之大也孝之大者蓋以先世之心為心而不以一已之心為心也君之是舉其殆庶幾於此者矣章氏世為汴人至兵部尚書始家泉之南安後自南安遷建之浦城自浦城遷處之龍泉其間支系繁衍後先顯者以數百計世遠族殷漸至不可於考君乃疚心痒志撮

拾於兵火焚棄之餘蒐輯於道路間關之際做諸史表  
遂為此編其他遺言遺行與夫言有當質者又別為篇  
以見既成使來告曰吾子雅知我蓋遺一言以詔吾之  
子孫使無違吾志余聞而歎曰世之士大夫其問學非  
不富也辭章非不美且麗也然或藉之以干利祿取榮  
名足乎一已而已至其祖考之所自出支屬之所由分  
漫焉而不加省者豈少哉而於宗人族子相視如途之  
人者又豈少哉君之用心乃如此其賢於人亦遠矣昔

歐陽文忠公依漢年表為世譜而謂子孫不知姓氏之所從以昧昭穆之叙者禽獸不若也今君做史表為是書既無媿於文忠矣而其所自序亦曰子孫視為不急之務者非人也嗚呼君之用心其文忠公之心乎勿替引之後之人勉乎哉

送人遊龍虎山序

乃者海內分裂兵交日尋而廣信為郡實東南之要衝當陳氏據上游即為其所侵奪及參政公奉命南征提

兵不過萬人舉一郡六縣如摧枯拉朽其後陳旣盛兵東窺以爭是土而公之子某復班師往救戰敗陳兵擒其梟將若干人以歸由是陳失其勢遂縮手歸武昌不敢順流而東父子一時何其偉哉王君乃公之懿親自起兵時即在行間其所以佐公禁侵掠止妄殺卒使恩威並著為軍民所歸心者不一而足自他人言之孰不欲同登仕版以稍自見於時而君乃衣白衣日從文儒勝士相往還每風清日美則芒鞋竹杖訪赤松子於北

山弔沈隱侯於雙溪於以娛情烟渚宴景雲林且不知斯世之多故而是身之在軍旅中也君為人曠達可喜然好為汗漫遊歲之仲春將從金華南過信之貴溪登仙巖窺鬼公峰從入龍虎山遊諸勝處龍虎山乃張道陵所居子孫世其業至於今不替君去謁上清之故宮攬金沙之遺迹道朋真侶徘徊後先此行當必有所遇矣然高甍巨棟斬為荆榛斷塹頽垣悽人心目蓋陳氏之流毒茲地也非一日君升高而望歎其興亡欲求陳



將就擒之所而黎庶之散亡殆盡於是觀山川之如昨  
念人事之日非將遂執青節從白蜺以與夫道朋真侶  
遊於方之外回視身世不啻如鴻毛之輕君亦奇士也  
哉嗟乎君既不用於世其材無所見獨觀其出處之際  
遊從嗜好之間可以見其志之有在矣故予於序別而  
具道之如此

送揚州同知赴官序

和陽王秉彝氏由金華抵三衢既而以書來告曰同知

三衢郡事某君今以秩滿調江都三衢人士咸賦詩以惜其去而右簡之文非予之託而誰耶三衢距僕僅百里遠行道之人多誦君之美而獲稍知其為人今又重以王君之命雖不能文詎得而辭諸僕聞之郡府之職惟別駕為易為益有地千里有民累萬而趨走之吏呵衛之卒一皆視郡守為降殺然郡守之任乃獨重任之重者責之所歸也別駕有郡守之榮而無其責吾知其易為耳雖然方今天下多故兵事未息郡縣之煩勞非

復承平之比况江都當百戰之餘城郭無居民官無第  
舍空郊百里之外遺黎僅數十家而已當此之時而有  
戈甲之供億芻餉之轉輸往來之館勞郡守豈能獨任  
其責哉吾見別駕之難為也雖然古稱江都多才學之  
士竊意其如漢之劉瑜魏之陳琳唐之李善者猶往往  
避亂山谷間深匿而未出君能訪其人而羅致之與之  
議官政究民隱圖利害損益以行之則別駕之易為將  
在於此乎昔子游之治武城吾聖人首以得人為問僕

因竊取斯義以為序

治平類要總序

自古人君雖有出類拔萃之資至於治道之盛則未始不由學而致此稽古學古之事所以見於二帝三王之書而二帝三王之治有非後世之所能及者良以此耳周衰以來聖學不明為人君者概以古昔帝王迂遠而難遵不過求所謂卑近淺陋之說以苟且於一時其能超出乎當世者惟漢七制唐三宗之主及趙宋諸君而

已然此十數君者亦僅賢於後世之庸主若夫二帝三王之盛治詎可同日而語哉嗚呼二帝三王悉五百年而一逢由周之治乃千餘年而始有漢唐宋之為君然又不得與二帝三王並觀而稱極治之時何斯民之生於後世者之不幸耶則夫繼此而有國者其可不加之意耶加之意者亦在乎學焉而已矣一日良與四明陳桎論至於此以為人君之學舍古昔帝王則無所取徵而古昔帝王之行事見之於經史者班班可考顧以自

朝及夕萬幾出焉有未暇徧觀而盡察乃相為摘取二帝三王致治之由與漢唐宋為君之所以然及先民之格言史臣之論贊會粹成書名之曰治平類要而定其標目凡十篇君臨四方蓋本諸道述君道篇第一人君之職惟在用相述任相篇第二將用禦暴必善馭之述馭將篇第三設官用人國之重事述用人篇第四民為邦本愛以固之述愛民篇第五國之所賴莫重於食述足食篇第六去亂圖治非兵不可述制兵篇第七刑以

輔禮明慎為要述慎刑篇第八佞口覆邦貴在能遠述  
遠佞篇第九君能納諫斯無過舉述納諫篇第十終焉  
良等俱以空疎之學謬叨為士之名其於纂修固多簡  
略然開基之主繼體之君苟能潛心於此窮討而深思  
之庶幾由彼漢唐宋之為君以上追二帝三王之盛治  
則稽古學古之效復見於今日而此書之作要不為無  
小補矣是以忘其固陋而冒言之伏惟留神省察國家  
幸甚

君道篇第一

天道運四時行君道明萬幾理禹湯文武天下之大聖也夏桀商辛天下之大惡也而其所以為大聖大惡之分者道之明與不明耳欲為君盡君道道者何仁而已矣三代之得天下也以仁有此道也其失天下也以不仁喪此道也大哉道乎其興亡之所繫乎景前聖式後

王述君道篇

任相篇第二



人主不可以獨治也必有卿相輔佐之足任者然後可  
以君天下蓋卿相輔佐人主之基杖也所以上承王命  
下統百司以治民庶以定邦國而治體之得失國勢之  
安危繫焉昔黃帝任風后而天下治高宗任傅說而君  
德修蓋皆得乎任相之道故也荀卿有曰強國榮辱在  
於取相其知言者哉訂官箴謹侯度述任相篇

馭將篇第三

古者國君有難召將而詔之曰社稷安危一在將軍是

則帝王馭將之道惟在推誠以待之三代以降人情日異於古其待武士也始皆折之以氣而結之以恩蓋不折之以氣則流於姑息而生驕不結之以恩則過於嚴肅而生怨生驕與怨非止費財玩寇之弊而有不戢自焚之患矣揚子雲曰馭得其道則天下狙詐咸作使馭失其道則天下狙詐咸作敵後世欲治之君可不熟慮而慎行之述馭將篇

用人篇第四

書曰翕受敷施九德咸事俊又在官百僚師師百工惟時蓋天子者一世人材之宗主也九德之士所當兼收並蓄布而用之使各隨所長而施於事則百官皆賢而互相觀法百工皆治而不失其時矣然古之用人必貴於有德而後世人主或以才藝取人而不稽諸德行故有才無德之人咸得以進之噫德成而上藝成而下君子宜慎擇焉述用人篇

愛民篇第五

人情之所欲順之則安擾之則危故虞廷君臣相戒必曰罔怙百姓以從己之欲而太公之告文王亦曰利而勿害成而勿敗生而勿殺與而勿奪樂而勿苦喜而勿怒此愛民之道也自是以後惟漢晁錯論三王之所以本人情者庶幾近之以故文帝用其言而以清淨為治卒至黎民醇厚刑措而不用愛民之道其尚有出於此乎傳曰重社稷故愛百姓愛百姓故刑罰中殆謂是歟

述愛民篇

足食篇第六

足食之道惟在於厚民蓋民者財之府而財者民之命也故善興國者必先義而後利善養國者必先民而後國先義而後利所以教民順也先民而後國所以使民富也民苟順矣則國不至於不利苟富矣則國不至於獨貧傳曰未有義而後其君者也又曰百姓足君孰與不足百姓不足君孰與足其是之謂乎法常典原人情

述足食篇

制兵篇第七

天生五材兵能撥亂故軒轅之興其戰七十征頑伐鬼  
伐不絕書兵其可去乎然考之古天子之兵止於六軍  
六軍之兵止於六鄉其出也則為士為卒為旅為軍為  
師其入也則有比有閭有黨有旅有州有鄉既無坐食  
之費復無長屯之苦烏有如後世之所謂兵者哉雖然  
田不井授賦民無藝而古制之不復久矣漢以來能以  
節制伎擊者定四方載之史冊有足徵焉纘戎功奮武

衛述制兵篇

慎刑篇第八

古者大司寇以獄之成告於王王命三公叅聽之蓋刑者成也一成而不可變君子於是而盡心焉嗚呼刑於聖人雖不得而廢之然非其得已也是故不教而民從上也以身教之也教之而後從次也以言教之也既不能教之以身又不能教之以言而民有弗從者乃從而刑之下也刑之而當罪民固無所憾矣又從而虐之若

之誣之抑之有罪無罪同歸於非命而死不亦大可哀乎書曰欽哉欽哉惟刑之恤哉本忠恕示欽恤述慎刑篇

遠佞篇第九

自昔小人將竊取其權寵必先潛觀密察覘伺上意而迎合之蓋以人主好惡之不同喜怒之難必不如是不足以為容悅取媚之地故薛公事齊必視美珥所在以立其愛姬申不害相韓必視昭侯所悅以謀其國事讒



佞之事君多合而少忤者大抵然也夫巧言如簧詩人  
刺之利口覆邦聖人所惡有言者不必有德而佞者不  
知其仁為人上者可不有辨於斯乎述遠佞篇

納諫篇第十

夫帝王之德莫盛於納諫君失於上則臣補於下臣諍  
於下則君明於上所繫重焉是故古之明王求諫如不  
及納諫如轉圜諒直者嘉之許犯者義之愚淺者恕之  
狂誕者容之蓋以已過難知惟恐其不聞也堯設諫鼓

禹拜昌言上聖且爾況下此者乎易曰山下有澤咸君  
子以虛受人述納諫篇

春秋三傳纂元序

錯薪刈楚披沙揀金微事尚然而況於學乎況於聖人  
之經有所蕪沒於傳注者乎然則春秋之文昭揭千古  
學士大夫往往童而習之白首不知其統緒之會歸者  
無他亦惟傳家之言有以混淆其間故耳嗚呼春秋辭  
尚簡嚴游夏之徒已不能贊以一辭而吾聖人之微言

與指果有待於支離繁碎而後見耶傳春秋者有三曰  
左氏公羊氏穀梁氏然公穀主釋經左氏主載事能令  
百代之下頗見本末而因以求意者左氏之功為多然  
而義例宗指交出乎巫祝卜夢之間讜言善訓不多於  
委巷浮戲之語鱗雜米聚混然難證而公穀之說又復  
互相彈射不可強通遂令經意分裂而學者迷宗也良  
自蚤歲受讀即嘗有病於斯尋繹之次因取三家之言  
稍加裁翦以掇其元要疏之經文之下其於一事之傳

首尾異處者既得以類而從而文意俱異各有可存者亦皆並列其語然後隨文觀義若網在綱雖行有刊句句有刊字非復本文之舊而鋤荒屏翳使之日星垂而江河流者不既有助乎方之刈楚揀金之細不又有間乎雖然亦將藏之篋笥以自備遺忘而已若夫優柔厭飫自博而反約則三君子之成書在也予亦安敢有所取舍其間以為是經之蠹哉

黃氏南薰樓會飲詩序

庚申之秋余訪蘇太史先生於黃氏義門將自是入越黃氏之老資深公堅留不聽去既而劉君養浩趙生彥方亦相繼至而吳侯子宇則固客授其家資深悉宴之宅左之南薰樓歡洽殊甚養浩以此會雖出邂逅然蘇先生來自城府彥方至自邑已與子宇館寓雖近而亦一居嚴陵一家烏傷萬山中不鄙謂余又方回自千里外一日畢集於此豈偶也哉觀江山之如昨念人事之難常誠不宜以無紀資深之子仲昭英俊子弟也聞之

喜躍即請以今夕復何夕共此燈燭光分韻而余得此  
字先生且命書歲月遂序之云而系之以詩曰

昔出念途阻今歸歎年駛泰階謂久平吾道有如此主  
人識余意開筵集文史庶令歡宴餘悶懷為之洗談諧  
皆素心倡和盡知己此會諒難數不樂將何俟

九靈山房集卷六